

**Uunga siunnersuut: Nunami inuussutissarsiutinut tunngatillugu
inuussutissarsiornermik siuarsaaneq pillugu Inatsisartut inatsisaat nr. xx, xx 2012-
meersoq**

Kapitali 1

Atuunneqarfia

§ 1. Aningaasanik immikkoortitsineqassaaq inuussutissarsiornermi pilersaarutitut inuiaqatigiit aningaasarsiorneranni iluaqusiisinnaasutut nalilerneqartunut, assersuutigalugu tunisassiorneruneramik suliffissanillu amerlanerulersitsinernik kinguneqartut, tapiissuteqarfigineqarnissaat siunertaralugu tapiissutitigut aaqqiissutinik aningaasalersuisussanik.

Imm. 2. Ingerlatsinermut namminermt tapiissuteqartoqarsinnaanngilaq.

§ 2. Inatsisartut inatsisaat nunami inuussutissarsiutinut tapiissuteqarnernut atuuppoq. Nunami inuussutissarsiutinut ilaapput kiffartuussinerup, takornariartitsinerup, suliffissuaqarnerup, niuernerup, akunnittarfeqarnerup, IT-lerinerup, misigisassarsiorititsilluni inuussutissarsiornerup assigisaasalu iluanni suliffeqarfiit ingerlatallu allat.

Imm. 2. Inatsisartut inatsisaat manna malillugu siunertanut inatsisit allat malillugit tapiissuteqartarnermi aaqqiissutinut ilaareersunut tapiissuteqartoqarsinnaanngilaq.

§ 3. Aallaavittut inuussutissarsiornermi ingerlatanut Kalaallit Nunaanni isumagineqartunut taamaallaat tapiissuteqartoqarsinnaavoq. Taamaattorli pikkorissarnernut imaluunniit atortussanik pisiortornernut Kalaallit Nunaanni neqeroorutaasinnaanngitsunut tapiissuteqartoqarsinnaalluni.

Kapitali 2

Inuussutissarsiornermut tapiissutit aningaasatillu immikkut ittut

§ 4. Aningaasat ukiumoortumik aningaasanut inatsimmi immikkoortinneqartut iluanni tapiissuteqartoqartassaaq.

§ 5. Tapiissutit qinnuteqareernermi tunniunneqassapput, makkunungalugu atatillugu aningaasartuutit uppernarsaasernerini utertinnissaannut neriorsuinikkut:

- 1) pilersitsineq amma alliliineq,
- 2) tunisassianik suleriaatsinillu ineriartortitsineq,

3) niuerfissanik pilersitsineq imaluunniit

4) pilersaarusionerq.

Imm. 2. Taamattaq tapiissutit tunniunneqarsinnaapput aningaasat inuussutissarsiteqartunik siunnersorneqarnermut atugassanik aningaasat amerlassusii aalajangersimasut neriorsuutiginerisigut, soorlu inatsisilerituumit imaluunniit kukkunersiuisunit ikiorneqarneq.

Imm. 3. Tapiissuteqarnissamik neriorsuineq erseqqinnerusumik piumasaqaateqarnikkut tunniunneqartassaaq.

Imm. 4. Imm. 1 aamma 2 malillugit tapiiffigineqarnissamik qinnuteqaat qinnuteqarnissamut immersugassaq Naalackersuisunit suliarineqarsimasoq atorlugu suliarineqassaaq, paasissutissanillu tassani piumasaqaatigineqartunik imaqaassalluni.

§ 6. Suliaqarfinnut aalajangersimasunut imaluunniit suliffeqarfinnut immikkut ittunut tapiissuteqartarneq pillugu Naalackersuisut maleruagassanik aalajangersaasinnaapput, tamakkununga ilaallutik aningaasaatit aalajangersimasut ilaat ukiumoortumik aningaasanut inatsimmi immikkoortinneqartut tamakkununga inniminneerneqartassallutik kiisalu suliaqarfinnut imaluunniit suliffeqarfinnut tamakkununga tapiissuteqarnissaq pillugu neriorsuinissamut piumasaqaatit erseqqinnerusut aalajangersarlugit.

Kapitali 3

Piumasaqaatit nalinginnaasut

§ 7. Inuussutissarsiornermi suliffeqarfinnut pilersaarutinullu namminersortunut, piffissap sivisuup ingerlanerani aningaasarsiornikkut sinneqartooruteqarnissamik siunertaqartunut taamaallaat tapiissuteqartoqarsinnaavoq.

Imm. 2. Tapiiffigineqarnissamik neriorsuut allanut tunniunneqarsinnaangilaq imaluunniit eqqartuussutitigut malersuinissamut peqquteqartitsisinaanani.

Imm. 3. Pilersaarutinut imaluunniit ingerlatanut pisortat aningaasaataannit allanit tapiissutinik imaluunniit aningaasalersuinermi pissarsisangitsunut taamaallaat tapiissuteqartoqarsinnaavoq.

Imm. 4. Tapiissuteqarnissamik neriorsuineq qinnuteqaammi ingerlatsinikkut inuiaqatigiinnilu aningaasarsiornerup nalilersorneqarnera tunngavigalugu tunniunneqartassaaq. Ingerlatsinermi aningaasarsiornikkut naliliinermi ilaatigut qinnuteqartup suliaqarfitsigut aqutsinikkullu piginnaasaqarfiinik piginnaasaanillu naliliineq, qinnuteqartup aningaasarsiornera niuernermilu pilersaarutaata aalajangersimasup atorsinnaassusia naliliinermi ilanngunneqartassallutik.

§ 8. Tapiiffigineqarnissamik neriorsuineq inunnut imaluunniit suliffeqarfinnut tigussaasunut Kalaallit Nunaanni najugaqartunut imaluunniit nalunaarsorsimasunut kiisalu Kalaallit Nunaanni tamakkiisumik akileraartussaataitaasunut taamaallaat tunniunneqarsinnaavoq.

Imm. 2. Tapiiffigineqarnissamik neriorsuineq tunniunneqarsinnaangilaq, pissarsisussaq imaluunniit aqutsisuni imaluunniit siulersuisuni inuk aqutsisuusoq akileraartarnermi inatsimmik annertuumik unioqquutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkanik unioqquutitsinermini pineqaatissinneqarsimappat imaluunniit pisortanut amerlasuunik akiitsoqarpat.

Imm. 3. Neriorsuineq tapiiffigineqarnerlu pillugit qinnuteqartumut Naalackersuisut qaavatigut piumasaqaateqarsinnaapput atugassaqartinneqarlutillu, kiisalu tamakku pillugit maleruagassanik erseqqinnerusunik aalajangersaasinnaallutik.

Kapitali 4

Tapiissutit amerlassusii sivilissusii

§ 9. Tapiissuteqarnissamut neriorsuineri taaneqassaaq, tapiissuteqarsinnaanermut aningaasat amerlanerpaaffissaat qanoq amerlatigissanersut, kiisalu aningaasat taakku killissaasa iluini aningaasartuutit uppersaaserneqarsimasut procentiisa qanoq amerlassuseqarneri utertinneqarsinnaanersut..

Tapiissutit tunniunneqarnissaannut piumasaqaataavoq aningaasartuutit pilersaarummut toqqaannartumik tunngatinneqarsinnaappata, pilersaarutillu isumagineqarnissaanut pisariaqartinneqarpata. Taamattaq piumasaqaataavoq aningaasartuutit piffissap neriorsuiffiusup aalajangikkap iluani akilernerqartussaasut.

Imm. 2. § 5, imm. 1 malillugu tapiissuteqarnermi pilersaarutip nassuiarneqarnera, tapiiffigineqarnissamik neriorsuineri tunngaviusimasoq, malillugu aningaasartuutissatut uppersaataasut amerlanerpaamik 50 %-iisa amerlaqataat akilernerqarsinnaapput.

Imm. 3. Tapiissutit amerlassusissai neriorsuinerullu sivilissusissaa pillugit Naalackersuisut maleruagassanik erseqqinnerusunik aalajangersaasinnaapput.

Kapitali 5

Aqutsineq, nalunaarusiortarneq, atorunnaarsitsineq aamma maalaaruteqarneq

Aqutsineq aamma sulianik suliarinnittarneq

§ 10. Neriorsuineri aqutsineq tapiissutinillu akiliuteqarneq pillugit kommunalbestyrelsimik imaluunniit suliffeqarfimmik allaffissornermik ingerlataqartumik Naalackersuisut isumaqatigiissusiorsinnaapput.

Stk. 2. Imm. 1 malillugu suliffeqarfimmik allaffissornermik ingerlataqartumik isumaqatigiissusiortoqarpat, pisortat ingerlatsineranni sulianik suliarinnittarneq pillugu inatsisartut inatsisaat aamma ingerlatsineri ammasuunissaq pillugu inatsisartut inatsisaat suliffeqarfiup allaffissornermik ingerlataqartup inatsisartut inatsisaat manna malillugu suliaminik isumaginninnera pillugu atuutsinneqassapput.

Nalunaarusiortarneq aamma paasissutissat pillugit nalunaaruteqartarneq

§ 11. Nalakkersuisut inunnit imaluunniit suliffeqarfinit tapiiffigineqarnissamik neriorsorneqarsimasunit paasissutissat, uppersaatit, takussutissat naatsorsuutillu tapiissutinik akiliinissamut aalajangerniarnermi pisariaqarsinnaasutut nalilerneqartut tamaasa tunniuteqqullugit piumasaqarsinnaapput.

Imm. 2. Naatsorsuutininik saqqummiussisarneq, kukkuniuineq, nakkutillineq misissuisarnerlu pillugit maleruagassanik erseqqinnerusunik Naalakkersuisut aalajangersaasinnaapput.

Neriorsuinerup atorunnaarsinnera aamma tapiissutinik utertitsisarneq

§ 12. Tapiissuteqarnissamik neriorsuinerup atorunnaarsinnissaa imaluunniit tapiissutinik utertitsinissaq pillugu Naalakkersuisut aalajangiisinaapput, tapiissuteqarfigineqartoq pisussaaitaanani inatsisartut inatsisaat manna malillugu tapiiffigineqarsimappat imaluunniit tapiiffigineqarnissamik neriorsuummik angusaqarsimappat imaluunniit neriorsuummik pissarsimappat imaluunniit tapiiffigineqarsimappat.

Imm. 2. Ima pisoqarsimatillugu utertitsinissaq piumasaqaatigineqarsinnaavoq:

- 1) Tapiissuteqarfigineqartoq piaaraluni imaluunniit annertuumik mianersuaalliornikkut paasissutissanik tapiissutinik pissarsinissamut pingaaruteqartunik eqqunngitsunik imaluunniit pututitsiniutinik tunniussaqaarsimappat.
- 2) Tapiissutinik pissarsinissamut piumasaqaatit pigisimangippagit.

Imm. 3. Inuit imaluunniit suliffeqarfiit tapiissuteqarfigineqarnissamik neriorsorneqarsimasut, aningaasarsiornermi pissutsinilu allani tapiiffigineqarnissamik neriorsuisimanerup atorunnaarsinneqarnissaanut Naalakkersuisut naliliinissaannut pingaaruteqarsinnaasut annertuumik allangornerini pillugit Naalakkersuisut nalunaarfigissallugit pisussaaffeqarput.

Imm. 4. Qinnuteqartoq imaluunniit suliffeqarfik ima iliorsimatillugu tapiiffigineqarnissamik neriorsorneqarneq imminut isumagisumik atorunnaassaaq:

- 1) naatsorsuutininik imaluunniit uppersaatininik allanik Naalakkersuisut § 10, imm. 1 malillugu pissarsiarisassaat tassani piffissaliussap iluani nassiussinngitsoortoq imaluunniit
- 2) akiliisinaajunnaartussatut suliarineqarpat, imminut akisussaajunnaarsitaappat imaluunniit suliffeqarfimmik ingerlatsisinaanerminik arsaarneqarpat.

Maalaaruteqarneq

§ 13. Inatsisartut inatsisaat malillugu aalajangiinerit allaffissornikkut oqartussanut allanut maalaarutigineqarsinnaanngillat. Tamannattaq § 10, imm. 1 malillugu atuuppoq kommunalbestyrelsi imaluunniit allaffissornikkut suliffeqarfik aalajangiisuusimappat.

Kapitali 6

Pineqaatissiinerit aamma atuutsilerfissaa assigisaallu

§ 14. Kinaluunniit piaaraluni imaluunniit annertuumik mianersuaalliornikkut ima iliortoq Kalaallit Nunaanni Pinerluttulerinermi inatsit malillugu pineqaatissinneqarsinnaavoq:

- 1) Pisussaataananani tapiiffigineqarnissamik neriorsorneqarnissaq imaluunniit tapiissutinik akiliiffigineqarnissaq anguniarlugu paasissutissanik eqqunngitsunik imaluunniit pututsitsiniutinik tuniussisoq imaluunniit paasissutissanik nipangiussisimasoq.
- 2) Tapiissutinik tunniunneqarsimasunik tamatumunnga piumasaqaatit unioqqutillugit atuisoq.

Imm. 2. Inatsisartut inatsisaanni maleruagassiat malillugit Kalaallit Nunaanni Pinerluttulerinermi Inatsimmi malittarisassat malillugit akiliisitsinermik pineqaatissiinissaq aalajangersarneqarsinnaavoq.

Imm. 3. Inatsisartut inatsisaanni imaluunniit inatsisit malillugit aalajangersagaq malillugu akiliisitsinissamik pineqaatissiisarnissamut pisinnaatitsineqarpat, Kalaallit Nunaanni pinerluttulerinermi inatsimmi § 17 malillugit akiliisitsineq inummut inatsisinut attuumassuteqartumut tutsinneqarsinnaavoq.

Imm. 4. Inatsisartut inatsisaat manna malillugu imaluunniit inatsisartut inatsisaat malillugit maleruagassat aalajangerneqarsimasut malillugit akiliisitsinermik pineqaatitsiissutit landskarsimut nakkartinneqassapput.

§ 15. Inatsisartut inatsisaata atuutilerfigissavaa 1. januar 2013.

Imm. 2. Tamanna ilutigalugu takornariartitsinermik inuussutissarsiuteqarnerup nunamilu inuussutissarsiornerup iluanni inuussutissarsiornermik siuarsaanissaq pillugu inatsisartut inatsisaat nr. 14, 12. november 2001-imeersoq, inatsisartut inatsisaatigut nr. 10, 14. november 2004-meersukkut allanngortinneqarsimasoq atorunnaassaaq.

Imm. 3. Takornariartitsinermik inuussutissarsiornerup nunamilu inuussutissarsiornerup iluanni inuussutissarsiornermik siuarsaanissaq pillugu inatsisartut inatsisaanni pisinnaatitsiissutit maleruagassat atorunnaarsinneqarnissaasa tungaannut atuutiinnassapput.

Imm. 4. Taarsigassarsinissamut neriorsuutit, qularnaveeqqusiinerit imaluunniit tapiiffigineqarnissamik neriorsuutit takornariartitsinermik inuussutissarsiornermut aningaasaliissutissatut tapiissutit pillugit inatsisartut inatsisaanni nr. 15, 31. oktober 1996-imeersumi pisinnaatitsineqarluni tunniunneqarsimasut, nunami inuussutissarsiutinut aningaasaliissutissatut tapiissutit pillugit inatsisartut inatsisaat nr. 20, 30. oktober 1998-meersoq aamma takornariartsitsinermik inuussutissarsiuteqarnerup nunamilu inuussutissarsiuteqarnerup iluanni inuussutissarsiutinik siuarsaanissaq pillugu inatsisartut inatsisaat nr. 14, 12. november 2001-imeersoq suli atuupput, inatsisartullu inatsisaat manna malillugu naleqqussarneqarlutik.

Namminersorlutik Oqartussat, ulloq XX YY 2012

Kuupik Vandersee Kleist